

RI RUC'OJLEN RI AJ CHICAJEL UCHUK'A'

Ri aj chicajel uchuk'a' nuc'uj rubey ri Ruk'ataj ri Jesu-cristo quichin ri Chojlaxela' chupan ri Ruq'uisibel tak K'ij. Ri aj chicajel uchuk'a' nic'atzin chupan ronojel ri rusamaj ri Dios. Ri aj chicajel uchuk'a' ri' c'o chupan ri ruk'ataj ri Dios quiq'uin checonojel iyaj mamaj ijatzul. Manek c'a ri rutiquiribal, ni ta chuka' ri ruq'uisibel (tatz'eta' c'a ri DyC 84:17). Ri aj chicajel uchuk'a' c'o chuvech re ruvach'ulef vacami. Ri alabo' y chuka' ri achi'a' yekasex chuxe' ri ya' y queri' ye'oc pe chupan ri K'ataj. Tok ri je' e ruc'amon, yetak chupan ri aj chicajel uchuk'a'. Niya'ox c'a chique ri k'atbel tzij richin niquben ri rusamaj ri Ajaf chuvech re ruvach'ulef pa rubi' rija'.

E C'O CA'I' RUVECH AJ CHICAJEL UCHUK'A'

Ri aj chicajel uchuk'a' ca'i' xban chire. Jun rubini'an ri Aj Chicajel Uchuk'a' richin ri Melquisedec y ri jun chic rubini'an ri Aj Chicajel Uchuk'a' richin ri Aarón (tatz'eta' c'a ri DyC 107:1). Ri Aj Chicajel Uchuk'a' richin ri Melquisedec, jari' ri nimalaxel uchuk'a'. Ojer can, ri uchuk'a' ri' rubini'an ri "Lok'olej Aj Chicajel Uchuk'a' achi'el ri Ruc'ojlen ri Ru-c'ajol ri Dios." Po xa xjal ri rubi', richin queri' man xcamulux ta janíla rubi' ri Ajaf. Chupan ri ojer tak k'ij, ri K'ataj xuya' rubi' re uchuk'a' re', ri Aj Chicajel Uchuk'a' richin ri Melquisedec. Jari' ri rubi' jun Tata'al Teuchunel ri xc'oje' pa ruk'ijul can ri Abraham (tatz'eta' c'a ruvech ri DyC 107:2-4).

Ri Aj Chicajel Uchuk'a' richin ri Aarón, jari' ri chak'laxel aj chicajel uchuk'a'. Jare' elesan pe riq'uin ri nimalaxel uchuk'a'. Ri uchuk'a' ri' Aarón rubi' roma xya'ox pe chire ri Aarón y chique ri ral'ual rija' chupan checonojel ri quija-

tzul. Ri achi'a' quic'uan ri Aj Chicajel Uchuk'a' richin ri Aarón yetiquir yequiben ri samaj richin ri cukubabel c'u'x, y chuka' richin ri tzolibel c'u'x y ri kasanic chuxe' ya' (tatz'eta' c'a ri DyC 107:13-14, 20).

Ri c'o quiqu'in ri Aj Chicajel Uchuk'a' richin ri Melquisedec c'o cuchuk'a' y quik'atbel tzij richin niquiyukej ri K'ataj y richin niquiben ri ruch'abalixic ri utzilej rutzijol chuvech chijun re ruvach'ulef. Rije' e c'o pa ruvi' ronojel ri lok'olej rusamaj ri Ajaf chupan ri K'ataj (tatz'eta' c'a ri DyC 84:19-22). Niquic'uaj rubey ri samaj chupan ri lok'olej nimajay richin ri Ajaf. Chuka' rije' e c'o pa quivi' ri To'onel Xatat (barrio), y Ruk'a' K'ataj (rama), y Ruxatat K'ataj (estaca), y Ruxe'el K'ataj (misión). Rije' yequic'achojirisaj ri yava'i', y yequiturusaj tak ac'uala', y niquiya' ch'aka' chic turusanic chique ri vinaki' ri e c'o chupan ri K'ataj. Ri ru profeta ri Ajaf, ri Ruvi'xal ri K'ataj, ja rija' ri Tata'al Teuchunel ri c'o pa ruvi' ri Aj Chicajel Uchuk'a' richin ri Melquisedec (DyC 107:65-67).

Tasiq'uij c'a ruvech ri DyC 107:1-4.

¿Achique cami ri ca'i' uchuk'a' ri e c'o?

¿Achique modo xyatej ri rubi' ri Aj Chicajel Uchuk'a' richin ri Melquisedec?

RI JAKBEL RICHIN RI AJ CHICAJEL UCHUK'A'

Man junan ta ri aj chicajel uchuk'a' riq'uin ri *jakbel* richin ri aj chicajel uchuk'a'. Jun Teuchunel (presbítero) c'o ruchuk'a' richin nuben jun kasanic chuxe' ya'. Man riq'uin vi ri', manjun rubaniquil nuben vi man ya'on ta ri k'atbel tzij chire roma ri obispo. Ri obispo c'o pa ruk'a' ri *jakbel* richin ri aj chicajel uchuk'a'. Romari', rija' nitiquir yeruben ri lok'olej samaj chupan ri To'onel Xatat (barrio) acuchi c'o vi rija'. Roma c'ari', ja rija' ri nibin chire ri Teuchunel (presbítero) vi c'o modo nuben jun kasanic chuxe' ya'.

Ri Ruvi'xal ri K'ataj, ja rija' ri profeta. Jac'a rija' c'o pa ruk'a' ri *jakbel* richin ri aj chicajel uchuk'a'. Riq'uin c'ari', rija' nuben ronojel ri lok'olej samaj chupan ri K'ataj. Ja rija' ri niya'on ri *jakbel* chique ri Nimatata'al (patriarca), ri obispo'i', ri ruvi'xal ri Ruxatat K'ataj (estaca), y ch'aka' chic vinaki'. C'ari', re achi'a' re' c'o chic quiqu'in ri *jakbel* ri nic'atzin chubanic ri quisamaj rije' chiquijunal.

Ri vi'xal ribini'an Joseph F. Smith quere' xubij:

"Chiquijunal ri achi'a' ri yetak chupan ri aj chicajel

uchuk'a', c'o quik'atbel tzij. Man riq'uin vi ri', nic'atzin chi ronojel ri niban riq'uin re k'atbel tzij re', niban c'a riq'uin jun choj rubaniquil. Nic'atzin niban tok ruc'amon chi niban, y chuka' nic'atzin niban acuchi ruc'amon chi niban. Chuka' nic'atzin chi niban chupan jun chojilej rubeyal. Ri uchuk'a' ri c'o pa ruvi' ronojel re samaj re', jari' ri jakbel richin ri aj chicajel uchuk'a'.'

¿Achique camí rucojollil ri aj chicajel uchuk'a' riq'uin ri jakbel richin ri aj chicajel uchuk'a'?

RI OYONIC Y RI SAMAJ RICHIN RI AJ CHICAJEL UCHUK'A' RICHIN RI AARON

Tok ri Aj Chicajel uchuk'a' richin ri Aarón niya'ox chire jun vinek, rija' nitak chupan jun samaj chupan ri aj chicajel uchuk'a' ri'. Ri samaj ri' chupan ri aj chicajel uchuk'a' e elesan pe riq'uin ri aj chicajel uchuk'a' (tatz'eta' c'a ri DyC 84:29-30 y chuk'a' ri 107:5). Chiquijujunal ri samaj quic'uan ri ejka'n ri niyatej chique ri achi'a' ri niquimol qui' chupan ri quimolaj richin ri aj chicajel uchuk'a'. Ri molaj ri' rubini'an achibilanic. C'o jun yukenel o jun ruvi'xal pa ruvi' chiquijujunal ri achibilanic. Ri yukenel o ri vi'xal yerutijoj ri vinaki' ri e c'o chupan ri achibilanic chire ri quisa-maj.

Ri tak samaj chupan ri Aj Chicajel Uchuk'a' richin ri Aarón e jare': ri *To'onel* (diácono), ri *Tijonel* (maestro), ri *Teuchunel* (presbítero), y ri *obispo*. Ch'aka' chic achi'a' ye'oc pe chupan ri K'ataj tok e rijitek chic. Stape' e rijitek chic ri achi'a' ri', yetak nabey chupan ri samaj rubini'an To'onel. C'a c'ari', tok rije' e ruc'amon, yejote' chupan ri ch'aka' chic samaj.

RI TO'ONEL (DIÁCONO)

Tok jun ala' kasan chic chuxe' ya' y jiquiban pe chupan ri K'ataj, vi rija' ruc'amon, c'o modo nitak chupan ri samaj rubini'an To'onel. Re' niban tok c'o chic cablajuj (12) ruju-na'. C'o jalajoj ruvech rusamaj jun To'onel. Nujech ri Lok'olej Va'in chique ri ch'aka' chic vinaki' chupan ri K'ataj. Chuk'a' nuya' rutzil quivech ri vinaki' tok ye'oc chupan ri molojri'il. Chuka' nuto' richin nujosk'ij ri acuchi yeban vi ri molojri'il. Noc jun quitako'n ri yukenela' chupan ri aj chicajel uchuk'a'. Chuka' niquiben ch'aka' chic samaj ri nibix chique.

RI TIJONEL (MAESTRO)

Jun ala' c'o modo nitak chupan ri samaj rubini'an Tijonel tok c'o chic cajlajuj (14) rujuna', vi rija' ruc'amon. Jun Tijonel ruc'uan ronojel ri uchuk'a' y ri k'atbel tzij ri c'o riq'uin jun To'onel. Chuka' rija' ruc'uan juba' más ruchuk'a' chuvech ri To'onel. Ri Tijonel chupan ri Aj Chicajel Uchuk'a' richin ri Aarón yeruto' ri vinaki' ri e c'o chupan ri K'ataj richin yequitakej ri rupixa' ri Dios (tatz'eta' c'a ri DyC 20:53-59). Romari' tok ri Tijonela' yecha'ox richin ye'oc ri quichajinel ri familia (maestro orientador). Rije' ye- quik'ejela' ri vinaki' chupan ri cachoch y yequitijoj richin niquiben ri utz. Nic'atzin chi yequitijoj chire ri utzilej rutzijol, achi'el tz'ibatel can chupan ri lok'olej tz'ibanic (tatz'eta' c'a ri DyC 42:12). Ri Tijonela' chuka' nunuc' apon ri caxlan vey y ri ya' richin ri Lok'olej Va'in.

RI TEUCHUNEL (PRESBITERO)

Ri Teuchunel ruc'uan ronojel ri samaj, ri k'atbel tzij, y ri uchuk'a' ri c'o riq'uin ri Tijonel y ri To'onel. Ruc'uan chuka' ch'aka' chic samaj ri man quic'uan ta ri Tijonel y ri To'onel (tatz'eta' c'a ri DyC 20:46-51). Jun Teuchunel niti-quir nukasaj chuxe' ri ya' jun chic vinek. Nitiquir chuka' nusamajij ri Lok'olej Va'in. Chuka' nitiquir yerutek ch'aka' chic Teuchunela', Tijonela', y To'onela' riq'uin ri aj chicajel uchuk'a'. Jun Teuchunel c'o ruk'ij richin nuc'uaj rubey jun molojri'il vi man c'o ta chirí jun achin ri ruc'uan ri Aj Chicajel Uchuk'a' richin ri Melquisedec. Nic'atzin chi ri Teuchunel nuch'abalij ri utzilej rutzijol chique ri ch'aka' chic vinek. Nic'atzin chi jun ala' c'o chic vaklajuj (16) rujuna' richin noc Teuchunel.

RI OBISPO

Jun obispo nitak y nich'ar riq'uin rusamaj richin nic'oje' pa ruvi' ri Aj Chicajel Uchuk'a' richin ri Aarón chupan jun To'onel Xatat (barrio). Ja rija' ri ruvi'xal ri achibilanic quichin ri Teuchunela' (tatz'eta' c'a ri DyC 107:87-88). Tok jun obispo nisamej chupan ri Aj Chicajel Uchuk'a' richin ri Aarón, nuben ri achique nic'atzin chuvech re ruvach'ulef. Numol ri lajujitakil ri niquiya' ri vinaki' y ri ch'aka' chic puek ri niquiya' chire ri K'ataj. Nito'on chuka' richin yec'oje' utzilej tak jay richin ri molojri'il (tatz'eta' c'a ri DyC 107:68).

Man riq'uin vi ri', ri obispo ja rija' jun Tata'al Teuchunel chuka'. Romari', rija' c'o pa ruvi' ronojel ri nic'atzin chupan ri To'onel Xatat (barrio), y chuka' pa quivi' conojel ri vinaki' ri e c'o chupan (tatz'eta' c'a ri DyC 107:71-73 y ri 68:15). Jun obispo ja rija' jun k'atoy tzij chupan ri Israel (tatz'eta' c'a ri DyC 107:74). Niyatej chire rija' ri sipanic richin ri nabenic. Jare' ri sipanic richin yerunabey y yerunic'oj conojel ri sipanic richin ri Uxlabixel, richin queri' nunabey vi e c'o ri niquibij chi e elenek pe riq'uin ri Dios y xa man que ta ri' (DyC 46:27).

Tasiq'uij c'a ruvech ri DyC 84:29-30 y chuka' ri DyC 107:5.

Catzijon chirij ri samaj ri e c'o chupan ri aj chicajel uchuk'a', achi'el tok e elenek pe riq'uin ri aj chicajel uchuk'a'.

Quixtzijon chirij ri quisamaj jun To'onel, jun Tijonel, jun Teuchunel, y jun obispo.

RI OYONIC Y RI SAMAJ RICHIN RI AJ CHICAJEL UCHUK'A' RICHIN RI MELQUISEDEC

Ri samaj chupan ri Aj Chicajel Uchuk'a' richin ri Melquisedec e jare': ri Runimakul (élder), ri Oxc'al Lajujlaxel (setenta), ri Tata'al Teuchunel (sumo sacerdote), ri Nimatata'al (patriarca), y ri lok'olej jiquibanel (apóstol).


RI RUNIMAKUL (ÉLDER)

Ye'oyox ri e Runimakul richin yetijon, yek'alajjirisan, yepixaban, yekasan chuxe' ya', y niquichajij ri K'ataj jantape' (tatz'eta' c'a ri DyC 20:42). Conojel ri achi'a' ri quic'uan ri Aj Chicajel Uchuk'a' richin ri Melquisedec, rije' e Runimakul. Ri e Runimakul c'o quik'atbel tzij richin niquiya' quik'a' pa ruvi' jun chic vinek y niquikasaj chire ri vinek ri' ri sipanic richin ri Uxlabixel (tatz'eta' c'a ri DyC 20:43). Ri jun Runimakul nuc'uaj rubey jun molojri'il riq'uin ri nubij ri Uxlabixel pa ránima (tatz'eta' c'a ri DyC 20:45 y ri 46:2). Jun Runimakul nitiquir yeruturusaj ri yava'i' (tatz'eta' c'a ri DyC 42:44). Ri Dios rubin chuka' chi rije' nic'atzin yeruturusaj ri tak ac'uala' (tatz'eta' c'a ri DyC 20:70). C'o modo chi jun Runimakul nuc'uaj rubey jun molojri'il vi manek jun Tata'al Teuchunel chiri' (tatz'eta' c'a ri DyC 107:11).

RI OXC'AL LAJUJLAXEL (SETENTA)

Jun Oxc'al Lajujlaxel noyox pe richin nuch'abalij ri utzilej rutzijol (tatz'eta' ri DyC 107:25). Chupan ri tak Ruxatat K'ataj (estaca), ri Oxc'al Lajujlaxela' yech'abalin chique ri vinaki' ri man e c'o ta chupan ri K'ataj.





RI TATA'AL TEUCHUNEL (SUMO SACERDOTE)

Jun Tata'al Teuchunel c'o ruk'atbel tzij richin nisamej chupan ri K'ataj y rija' chapayon ri samaj ri espíritu (tatz'eta' c'a ri DyC 107:10,12). C'o ruk'atbel tzij richin nisamej chupan conojel ri chak'laxela' tak oyonich chuka' (tatz'eta' c'a ri DyC 68:19). Ri vi'xal richin jun Ruxatat K'ataj (estaca), o ri vi'xal richin jun Ruxe'el K'ataj (misión), oyon richin ri Tata'al Teuchunela'.

RI NIMATATA'AL (PATRIARCA)

Jun Nimatata'al nicha'ox y nitak coma ri apostoli' richin ri K'ataj. Ri rusamaj rija' richin yeruya' teuchunic chique ri vinek ri e c'o chupan ri K'ataj chupan chiquijujunal ri Ruxatat K'ataj. Ri teuchunic ri nuya' jun Nimatata'al nuk'alajirisaj chikavech ri achique nurayij ri Dios chi nikaben vave' chuvech re ruvach'ulef. Jari' ri ruch'abel ri Ajaf chike roj chikajujunal. Jun Nimatata'al, ja rija' jun Tata'al Teuchunel chuka' (tatz'eta' c'a ri DyC 107:39-56).

RI APOSTOL (LOK'OLEJ JIQUIBANEL)

Jun apóstol, ja rija' nuk'alajirisaj ri Jesucristo chuvech chijun re ruvach'ulef (tatz'eta' c'a ri DyC 107:23). Ri apostoli' niqic'uaj rubey ri K'ataj chuvech chijun re ruvach'ulef. Ri achi'a' ri e takon richin ye'oc apostoli' chupan ri Aj Chica-jel Uchuk'a' richin ri Melquisedec, rije' e ch'aron pe chuka' richin e c'o chupan ri Achibilanic quichin ri Cablajuj Apostoli'. Yeyatej chique chiquijujunal ri apostoli' conojel ri jakbel richin ri rajavaren ri Dios chuvech re ruvach'ulef. Man riq'uin vi ri', xaxe ri nimalaxel apóstol yerusamajij checonojel ri jakbel ri'. Ja rija' ri Ruvi'xal ri K'ataj. Ri ch'a-ka' chic apostoli' yesamej chuxe' ri rutzij rija'.

Catzijon c'a juba' chirij ri quisamaj ri Rünimakul, ri Oxc'al Lajujlaxel, ri Tata'al Teuchunel, ri Nimatata'al, y ri apóstol.

RI ACHIBILANIC RICHIN RI AJ CHICAJEL UCHUK'A' RICHIN RI MELQUISEDEC

Ri Ajaf rupixaban chi ri achi'a' ri quic'uan richin ri aj chicajel uchuk'a' niquinuc' qui' chupan tak achibilanic. Jun achibilanic, jari' jumolaj vinaki' ri c'o junan quisamaj chupan ri aj chicajel uchuk'a'.

E c'o oxi' ruvech achibilanic chupan chiquijujunal ri Ruxatat K'ataj (estaca) richin ri Sión:

RI ACHIBILANIC QUICHIN RI E RUNIMAKUL

Ri achibilanic quichin ri e Runimakul banatajinek coma ri samajela' ri yecanej can pa jun c'ojlibel. Man riq'uin vi ri', c'o modo chuka' chi ri e Runimakul yebe juc'an chic. Pero rije' e takon pe richin yesamej xe pa jun c'ojlibel. Juba' man ronojel ri quisamaj niquiben rije' chunakaj ri cachoch (tatz'eta' c'a ri DyC 124:137). Man nic'o ta ruvi' che ri jumuch' vaklajuj (96) achi'a' yec'oje' chupan jun achibilanic quichin ri e Runimakul. C'o jun vi'xalonic (presidencia) pa quivi' rije'. Ri vi'xalonic ri' noyox roma ri vi'xal richin ri Ruxatat K'ataj (estaca). E c'o ch'aka' chic achi'a' ri manjani que'oc e Runimakul. Nibix chique rije' *ri xquebe'oc e Runimakul*. Ri achi'a' ri' niquic'uaj qui' chuka' riq'uin ri achibilanic quichin ri e Runimakul.

RI ACHIBILANIC QUICHIN RI OXC'AL LAJUJLAXELA'

Re achibilanic re' banon quichin coma ri e Runimakul ri yebe juca'n chic chuk'alajirisaxic ri rubi' ri Ajaf chuvech chijun re ruvach'ulef (tatz'eta' c'a ri DyC 124:139). Man nic'o ta ruvi' oxc'al lajuj (70) achi'a' ri e c'o chupan jun achibilanic quichin ri Oxc'al Lajujlaxela'. Vuku' tak vi'xal e c'o pa ruvi' re achibilanic re'. Rije' e camon pe chupan re samaj re' roma ri vi'xal richin ri Ruxatat K'ataj (estaca). Ri quisamaj rije' richin niquich'abalij ri utzilej rutzijol chique ri vinaki' ri manjani e c'o ta pe chupan ri K'ataj. Niquic'ul pe pixabanic riq'uin ri Nabey Achibilanic quichin ri Oxc'al Lajujlaxela'.

RI ACHIBILANIC QUICHIN RI TATA'AL TEUCHUNELA'

Conojel ri Tata'al Teuchunela' ri e c'o chupan jun Ruxatat K'ataj (estaca) e c'o chupan re achibilanic re'. Queri' chuka' ri Nimalej tak Tata'al y chuka' ri obispo'i'. Ja ri vi'xal richin ri Ruxatat K'ataj quiq'uin ri rupixabanela' e c'o pa ruvi' re achibilanic re'.

RI TAK ACHIBILANIC RICHIN RI AJ CHICAJEL UCHUK'A' RICHIN RI AARON

E c'o oxi' ruvech achibilanic chupan ri Aj Chicajel Uchuk'a' richin ri Aarón:

1. C'o jun achibilanic quichin ri To'onela'. Man nic'o ta ruvi' ri cablajuj (12) To'onela' chupan re' jun achibilanic re' (tatz'eta' c'a ri DyC 107:85). Jun To'onel noyox roma ri

obispo richin noc ri ruvi'xal ri achibilanic.

2. C'o chuka' ri achibilanic quichin ri Tijonela'. Re' ru-c'uan juvinek caji' (24) Tijonela' (tatz'eta' c'a ri DyC 107:86). Jun Tijonel noyox roma ri obispo richin noc ri ruvi'xal ri achibilanic.

3. C'o chuka' jun achibilanic quichin ri Teuchunela'. Man nic'o ta ruvi' cavinek vakxaki' (48) Teuchunela' chupan re jun achibilanic re' (tatz'eta' c'a ri DyC 107:87-88). Ri obispo, ja rija' ri ruvi'xal re achibilanic re'.

Ri obispo, ja rija' jun Tata'al Teuchunel. Romari', rija' c'o chuka' chupan ri achibilanic quichin ri Tata'al Teuchunela'.

Jun achibilanic xtich'aratej tok nic'o ruvi' ri achi'a' chuvech ri jampe' e k'ijun can chi yec'oje' chupan.

Checonojel ri vinek ri e uc'uayon richin ri aj chicajel uchuk'a', nic'atzin c'a chi rije' ye'oc chupan jun achibilanic. Jare' jun sipanic ri niyatej pe chique tok rije' yetak chupan ri aj chicajel uchuk'a'. Nirayix chi ri quic'uan ri aj chicajel uchuk'a' e c'o chupan jun achibilanic. Tok jun ala' o jun achin nitak pe chupan ri aj chicajel uchuk'a', noc c'a chiri' chupan jun achibilanic. Jari' c'a re chikavech apon, nic'atzin chi rija' nic'oje' can chupan jun achibilanic. Can xtic'oje' can chupan ri achibilanic según ri rusamaj.

Vi ri e c'o chupan jun achibilanic yesamej jebel, janíla yeto'ox, chuka' yeturusex y yetijox chire ri utzilej rutzijol coma ri quiyukenela'. Stape' jun achin c'o ch'aka' chic rusamaj chupan ri K'ataj, rija' jantape' xtic'oje' chupan jun achibilanic richin ri aj chicajel uchuk'a'. Tok niya'ox chire jun achin richin noc chupan jun achibilanic, jare' jun lo-k'olej sipanic chire.

¿Achique camí jun achibilanic? ¿Achique modo yeruto' jun achibilanic chiquijunal ri achi'a' ri e c'o chupan?

¿Jampe' vinek e c'o chupan jun achibilanic quichin ri e Runimakul, ri Tata'al Teuchunela', ri To'onela', ri Tijonela', ri Teuchunela'?

CH'AKA' CHIC MOCAJ RI UTZ YE'ANIC'OJ

Alma 13:1-19 (ri rubaniquil ri tok yetak ri achi'a' chupan ri aj chicajel uchuk'a')

Hebreos 7:11-13 (ri Aj Chicajel Uchuk'a' richin ri Melquisedec xtzolitej pe chuvach'ulef tok xpe ri Cristo)

Mateo 16:19 y ri DyC 68:12 (niyatej cuchuk'a' ri apostoli'. Achique ri niquitz'akatisaj chuvech re ruvach'ulef, chuka' nitz'akatisex chila' chicaj)

DyC 20:38-67 (ri samaj quichin ri e Runimakul, ri Teuchunela', ri Tijonela', y ri To'onela')

DyC 84 y 107 (ca'i' tak k'alajirisanic pa ruvi' ri aj chicajel uchuk'a')

1 Corintios 12:14-31 (checonojel ri samaj chupan ri aj chicajel uchuk'a' e c'atzinel)

RI AJ C'ULANEN TZIJ RUTINAMIT RI AJAF

Can pa rutiquiribel pe, ri Ajaf rubanon c'ulanen tzij riq'uin ri ruvinak. Tok ri ruvinak niquiben ri c'ulanen tzij riq'uin ri Ajaf, rije' niquetamaj achique nrajo' ri Ajaf richin niquiben. Chuka' niquetamaj achique turusanic ri niquic'ul. Ri c'ulanen tzij yequito' ri vinaki' richin ye'oc chojilej tak vinaki', richin queri' yetiquir niquiben ri rusamaj ri Ajaf. Ri tzobaj vinaki' ri niquiben c'ulanen tzij riq'uin ri Ajaf, jari' ri quibini'an ri Aj C'ulanen Tzij Rutinamit ri Ajaf. Ri vinaki' richin ri k'ataj, rije' e c'o chupan ri Aj C'ulanen Tzij Rutinamit ri Ajaf.

Tasiq'ulij c'a ruvech ri Deuteronomio 26:18. ¿Achique nibec'ulun chikavech tok ri Ajaf nubij, "jun vinakul ri man junan ta quiq'uin ri ch'aka' chic?"

¿Achique roma tok nibix tinamit aj c'ulanen tzij chique ri vinaki' ri e c'o chupan ri ruk'ataj ri Ajaf?

¿ACHIQUE CAMI JUN C'ULANEN TZIJ?

Chupan ri utzilej rutzijol, jun c'ulanen tzij jari' tok jun vinek o q'uiy niquiya' quitzij richin niquitakej jun rupixa' ri Dios, y ri Dios nusuj pe chi xtuya' jun turusanic chire ri nitaken. Ja ri Dios cha'oyon ri rubaniquil ri c'ulanen tzij y c'ari' nuk'alajirisaj chique ri profeta'i' ri e c'o chuvech re ruva-ch'ulef. Vi nikatakej ri kasujun chupan ri c'ulanen tzij, xti-kac'ul c'a ri nimalej utzil ri sujun pe chike. Pero vi man nikaben ta ri kasujun pa c'ulanen tzij, ri Dios man xtuya' ta ri turusanic chike. Jantek chuka' ri Dios nuya' jun c'ayeval pa kavi' tok man nikatakej ta ri kaya'on chikavech riq'uin rija'.

Tok yojoc chupan ri K'ataj, yekaben ca'i' oxi' c'ulanen tzij riq'uin ri Dios (tatz'eta' c'a ri Tanaj 20 rubini'an "Ri Kasanic Chuxe' Ya'"). Tok yojkasex chuxe' ya', roj nikaya' katzij richin xtikacusaj pa kac'aslen ri rubi' ri Jesucristo. Rija'

c'a nusuj chike chi e jampe' na ri xquekasex chuxe' ya' pa rubi' ri Jesucristo y xquecoch'on c'a pa ruq'uisibel, jec'a rije' ri xquecolotej (DyC 18:22). Chuka' nikaben c'ulanen tzij tok nikatij ri Lok'olej Va'in. Nikasuj apon chire ri Cristo richin xtikanatej y xquekatakej ri rupixa'. Rija' nusuj pe chike chi ri Lok'olej Ruxlabal xtic'oje' kiqu'in (tatz'eta' c'a ri DyC 20:77-79). Conojel ri vinaki' ri e c'o chupan ri K'ataj niquiya' ri quich'abel chi xtiquitakej ri pixa' richin ch'ajch'ojilej c'aslen, y chi xtiquitakej ri Uxlanibel K'ij, y chi xque'oc chojilej tak vinaki'.

Tok nikaben ri c'ulubic richin jumul, nikaya' ri kach'abel richin xtikatakej ch'aka' chic pixa'. Rija' nusuj chike chi xkojbec'oje' na jumul riq'uin rija' vi nikatakej chi utzil ri kabin (tatz'eta' c'a ri DyC 132 y chuka' ri tanaj 47 chupan re vuj re', rubini'an, "Ri Tzeketajic chupan ri Rajavaren ri Dios").

Ri Dios chuka' rubanon c'ulanen tzij quiq'uin ch'aka' chic molaj vinaki'. Rija' xuben jun c'ulanen tzij riq'uin ri Adán, ri Enoc, ri Noé, ri Le'i y chuka' quiq'uin ri ralc'ual ri Israel (tatz'eta' c'a ri Moisés 6:52 y ri Moisés 6:31-36 y ri Génesis 9:9-17 y ri Exodo 19:5-6 y ri 2 Nefi 1). Rija' xuben jun nimalej c'ulanen tzij riq'uin ri Abraham y quiq'uin ri rijatzul. Ri jun c'ulanen tzij ri' c'a nic'atzin na chique ri vinaki' ri e c'o chupan ri K'ataj vacami.


¿Achique camí jun c'ulanen tzij?

¿Achique c'ulanen tzij e kabanon riq'uin ri Dios?

¿Achique modo yojruturusaj ri Dios tok yekatakej ri katzij kaya'on chire chupan ri c'ulanen tzij?

RI C'ULANEN TZIJ RI XUBEN RI DIOS QUIQ'UIN RI ABRAHAM Y RI RALC'UAL

Ri Abraham ja rija' jun choj achin y rija' jun profeta. Ri ruc'aslen rija' nitzijox chupan ri Ojer Retal Tzij. Rija' man xrajo' ta xuya' quik'ij ri rutiox ri rutata'. Xa xerutakej conojel ri rupixa' ri Dios. Ri Dios xuben jun c'ulanen tzij riq'uin ri Abraham y quiq'uin ri ralc'ual roma ri Abraham jun chojilej achin. Juba' che ri c'ulanen tzij ri' c'a c'o na chupan ri quic'aslen ri e c'o chupan ri k'ataj vacami. Ri Ajaf xusuj chire ri Abraham chi xquec'oje' janíla e q'uiy rijatzul ri man tiquirel ta ye'ajilex. Xusuj chire ri Abraham chi chironojel ri rijatzul xtiyatej k'ij chique richin xticac'axaj ri utzilej rutzijol. Chuka' xusuj chique chi xqueturusex riq'uin ri aj



chicajel uchuk'a' y chi xtiya'ox k'ij chique richin xquequiben ri takbel ri nic'atzin chire ri jumul c'aslen riq'uin ri Dios. Ri Dios chuka' xusuj chire ri Abraham chi ri rijatzul rija' xtiquich'abalij ri utzilej rutzijol chique checonojel ri tinamit chuvech re ruvach'ulef. Jari' xtiquiben riq'uin ri aj chicajel uchuk'a'. Roma ri rijatzul ri Abraham, xqueturusex checonojel ri tinamit chuvech chijun re ruvach'ulef (tatz'eta' c'a ri Abraham 2:11). Ri Dios chuka' xusuj chique richin xuya' ri ruch'abel chique conojel ri ralc'ual y ri rumam ri Abraham, vi rije' xtiquiben ri ruchojmilal (tatz'eta' c'a ri Génesis 17:4-8).

Can que vi chuka' re' ri c'ulanen tzij ri xuben ri Dios riq'uin ri ruc'ajol ri Abraham ri rubini'an Isaac. Y chuka' queri' xuben riq'uin ri ruc'ajol ri Isaac ri rubini'an Jacob. C'a c'ari', ri Dios xujel ri rubi' ri Jacob y xubij Israel chire. Roma c'ari', ri rijatzul ri Jacob quibini'an ri Israeli'. Jac'a rije' bin chique ri tinamit aj c'ulanen tzij richin ri Dios.

Tasiq'uij c'a ruvech ri Abraham 2:9-11. Tach'obo' rij ri achique rusujun pe ri Dios chique ri vinaki' ri e aj c'ulanen tzij.

RI VINAKI' RI E C'O CHUPAN RI RUK'ATAJ RI JESUCRISTO JE RIJE' JUN TINAMIT AJ C'ULANEN TZIJ

Ri e ralc'ual y ri e rumam ri Abraham, man xaxe ta rije' ri vinaki' ri aj c'ulanen tzij richin ri Dios. Quere' xubij ri Dios chire ri Abraham: E jampe' c'a ri vinaki' ri xtiquinimaj re utzilej rutzijol xtiquic'uaj ri abi' rat. Y rije' xque'oc chupan ri avijatzul, y xqueyacatej y xtiquiya' ak'ij achi'el vi ta rat at quitata' (Abraham 2:10). Que c'are', e c'o ca'i' molaj vina-ki' ri xqueturusex roma ri nimalej c'ulanen tzij ri banon riq'uin ri Abraham. Ri nabey ja ri choj tak vinaki' ri e rijatzul ri Abraham. Ri ruca'n ja ri vinaki' ri ye'oc rijatzul rija' tok niquinimaj ri utzilej rutzijol richin ri Jesucristo y niqita-kej chupan ri quic'aslen.

Tok yojkasex chuxe' ya' y yojoc chupan ri K'ataj, roj yojc'amatej chupan ri rijatzul ri Abraham. Y chuka' nikac'ul ri c'ulanen tzij ri xuben ri Ajaf quiq'uin ri Abraham, ri Isaac, y ri Jacob (tatz'eta' c'a ri Gálatas 3:26-29). Vi roj nikanimaj rutzij ri Dios, xtikabe'ichinaj c'a ri turusanic ri xsuj chike chupan ri c'ulanen tzij ri banon can. Roj niya'ox k'ij chike richin yojruto' y yojruyukej ri Uxlabixel. Niya'ox k'ij

chike chuka' richin nikac'uaj ri aj chicajel uchuk'a'. Chuka' niya'ox pe k'ij chike richin nikach'ec ri c'aslen jumul riq'uin ri Dios. Man c'o ta jun turusanic ri nic'o ruvi' nim chiquivech re turusanic re'.

Mas ta c'a c'o turusanic ri niya'ox chike, c'o chuka' samaj ri nic'atzin chi nikaben. Ri Ajaf xusuj chire ri Abraham chi ri rijatzul rija' xtiquibech'abalij na ri utzilej rutzijol chique conojel ri vinaki' chuvech re ruvach'ulef. Ja ri samaj ri' yojtajin chubanic ri samaj ri' vacami. Ri K'ataj yerutek el ch'abalinela' chiquitijoxic ri vinaki' chirij ri utzilej rutzijol. Chiquijujunal ri vinaki' ri e c'o chupan ri K'ataj nic'atzin chi rije' chuka' niquich'abalij ri utzilej rutzijol chique ri ch'aka' chic vinaki'. Xaxe ri vinaki' ri e c'o chupan ri Ruk'ataj ri Ajaf c'o quik'ij richin niquich'abalij ri kitzij utzilej rutzijol chique ri vinaki' chuvech chijun re ruvach'ulef.

Ja roj ri vinaki' aj c'ulanen tzij, y romari' nic'atzin chi yekatakej conojel ri rupixa' ri Ajaf. Vi ri vinaki' niquetzelej ri c'ulanen tzij y man yequitakej ta ri pixa', manek chic rejkalen ri quitzij quiya'on can. Quere' c'a rubin ri Ajaf: Yin ri Ajaf can c'o vi chi ninben ri nusujun can chive vi rix ye'itakej ri nupixa'. Man riq'uin vi ri', vi man ye'itakej ta ri nupixa', can manjun xtinsuj chive (DyC 82:10). Tok roj kac'ulun chic ri utzilej rutzijol, vi man yekatakej ta ri pixa', jari' tok yojetzelex roma ri Ajaf (tatz'eta' c'a ri DyC 132:4). Ri Dios quere' rubin: Tik'ata' c'a ivi' chuvech ronojel ri mac, richin queri' man ta xquekaka pan ivi' c'ayef tak k'axomal. Roma ri janila niya'ox chire, janila nic'utux chire chuka'. Y ri vinek ri xtimaacun chirij jun nimalej sakil, nimallej chuka' k'axomal xtuc'ul (tatz'eta' c'a ri DyC 82:2,3).

Tasiq'uij c'a ruch'abel ri Colonel, Mateo 5:14-16. ¿Achique cami nikaben richin yojoc jun sakil chiquivech ri ch'aka' chic vinaki' ri man e c'o ta chupan ri K'ataj?

¿La nic'atzin cami chi yekatakej checonojel ri rupixa' ri Dios y yojbiyin choj chuvech rija'?

¿Achique xtikac'ulvachij vi man nikaben ta ri kach'abel kaya'on can chire ri Dios?

RI C'AC'A' Y RI JUMUL C'ULANEN TZIJ

Ri Ajaf xubij chi chijun ri utzilej rutzijol jari' rubini'an ri c'ac'a' y ri jumul c'ulanen tzij. Jare' e ruc'uan conojel ri c'ulanen tzij ri yeban tok yojkasex chuxe' ya' y tok nikatij ri Lok'olej Va'in. E ruc'uan chuka' ri c'ulanen tzij ri yebanatej chupan ri lok'olej nimajay richin ri Ajaf y ronojel ri ch'aka' chic c'ulanen tzij ri yeban. Ri Ajaf nubij "jumul"

chire re c'ac'a' c'ulanen tzij re' roma jun Dios ri man q'uisel ta ri banayon y roma man nijalatej. Jare' ri jumul c'ulanen tzij ri xuben ri Ajaf quiq'uin ri Adán, ri Enoc, ri Noé, ri Abraham, y ch'aka' chic profeta'i' chuka'. Re c'ulanen tzij re' man c'ac'a' ta chique ri profeta'i' ri'. Pero c'o jantek chuka' nelesex el re c'ulanen tzij re' chuvech re ruvach'ulef. Tok ri Ajaf nutzolij pe re c'ulanen tzij re' chuvech re ruvach'ulef, jari' tok re c'ulanen tzij re' c'ac'a' chique ri vinaki' ri' (tatz'eta' c'a ri Jeremías 31:31-34 y chuka' ri Ezequiel 37:26).

Tok nikanimaj ri c'ac'a' y ri jumul c'ulanen tzij, chuka' nikanimaj chi c'o chi nitzolin pe kac'u'x y yojkasex chuxe' ya' y nikac'ul ri Uxlabixel. Chuka' nikac'ul ri lok'olej tak sipanic chupan ri lok'olej nimajay richin ri Ajaf y nikaben ri c'ulanen tzij richin ri c'ulubic chupan ri lok'olej nimajay richin ri Ajaf. Nic'atzin chi yekatakej chi utzil ronojel ri pixa'. Vi quere' nikaben, ri Tata'ixel xtuya' chike ri jumul c'aslen riq'uin rija' chupan ri rajavaren (tatz'eta' c'a ri DyC 132:20-24 y chuka' ri tanaj 47 chupan re vuj re').

Yalan utz ruva kak'ij roma roj oj ri vinaki' aj c'ulanen tzij. Quere' xubij ri Ajaf chire ri utzilej vinek chupan ri ruk'ataj: Xtiya'ox c'a chire rija' ronojel ri c'o riq'uin ri Tata'ixel (tatz'eta' c'a ri DyC 84:38). Jare' yalan nim y romari' c'ayef richin nik'ax chikavech roj ri oj vinek. Ri Dios yeruya' pe ri rupixa' richin yojquito' pa kac'aslen. Vi roj nikanimaj ri rutzij ri Ajaf, xquekac'ul na ri turusanic y ronojel ri janíla jebel chicaj y chuka' chuvach'ulef. Xtiya'ox k'ij chike richin xkojc'oje' jantape' riq'uin ri Dios. Chuka' xtikac'ul ri rajovabal, y chuka' ri rujoyovabal, ri rutzil, ri runimirinen, ri ruchuk'a', ri retamabal, ri ruc'ojlemal, y ri rajavaren.

¿Achique nikasuj chi nikaben tok yojoc chupan ri c'ac'a' y jumul c'ulanen tzij?

CH'AKA' CHIC MOCAJ RI UTZ YE'ANIC'OJ

1 Nefi 13:23-26 (ri c'ulanen tzij e tz'ibatel can chupan ri Biblia)

1 Pedro 2:9-10 (jun vinakil ri man junan ta quiq'uin ri ch'aka' chic)

DyC 54:4-6 (achique nic'ulvachitej tok nixolk'otix jun c'ulanen tzij y achique ri niban tok nik'aj jun c'ulanen tzij)

DyC 132:7 (jun c'ulanen tzij niban riq'uin ri kitzij k'atbel tzij)

DyC 133:57-60 (achique roma nic'atzin ri c'ulanen tzij)

DyC 35:24 (achique niya'ox pe tok nitakex jun c'ulanen tzij)